

樂志堂文集

樂志堂文集卷九

南海 譚 瑩玉生撰

盧后山制府六十壽序一

代

國家有方隅重寄之臣禮緝區中威騰閩外咸欲其神明鞏固年力康彊而後外相超居長城永賴寇平仲以朝廷無事權爲鎖鑰之司文潞公與韋布知交共作耆英之會李藥師往征吐谷何憚一行裴晉國節度河東不徒臥護所以淮南草木亦識其威名戒外蠻夷欲詢其甲子又況撫三城之士庶猶聞頌禱之聲奠五管之山川實荷陶鈞之力尤宜同申私祝遙頌遐齡者已惟

我后山先生河嶽所鍾文武兼備表率方夏儀型百僚  
先代唯傳隱德教子各業一經幼時卽有奇徵夢人并  
授六印作十人饌而饗缶無儲讀萬卷書而韜鈴並習  
班聯玉筍帖換金花才足贊乎兵樞職乃司於戎府張  
嘉貞之詳處唐休璟之練知庫仗原多無待於詭言兵  
檄如飛爭看其奏決似纔閱簿閫對無遺何待拊牀列  
坐宜爾旋督軍儲於鄂渚又移使節於瀛洲鄒魯風淳  
澄清可俟河漕政弊障泄宜先塢流用王景之言築堰  
效李冰之法司臬俄經乎晉楚撫軍又屆乎河汾莫不  
簡在

帝心各從民欲持鞭况節杖鉞宣風特破柱以求姦復  
連榻而坐客願韋皋之久任期郭伋之重來傳書咸頌  
劉宏喫劍乃知張詠邊城析靜鈴閣簾垂望重如山心  
澄似水黠如胥吏感其德而傳歌貴似保衡服所言而  
動色旣而回疆不靖軍務方殷 命墨經以從戎衣皮  
袴以轉饗供其屣屨峙乃糗糧舉一囊而將亦爭趨置  
十弩而賊安能剽五千人相率敢負杜畿三千里所屯  
孰違劉晏遂使諸營遠剿未聞仰給於蒲羸頭品榮班  
更俾叨 恩乎孔翠進東宮之保傅寄南國之封疆緩  
帶輕裘精金古器酌泉自勵運甓誰閑鑄銅柱而唐德

謹書禁珠池而蠻風乃輯王忠嗣之保塞原當萬里之衝武元衡之入川殆極一時之選誰爲貪者舞文輒令先誅勿撓侍中鬪訟却聞相訪處脂膏而靡濶投犀象而始還辭朝却涖乎三吳開府卽移於全楚謝文靖有當時之譽去日彌思王伯重如初至之年蕭然無與禮義威武智名勇功羊鉅平之在江漢遠近胥懷杜征南之鎮荆湘士女相慶峴山弔古牛渚留賓投參佐之擣蒲課諸營其種柳此又番州之僚吏亦切思劉清海之黎氓無因借寇者已惟此孟秋之吉乃公六秩之辰旌節花明文章草綠有兒肖父均非簡札之才四海知公

卽荷棟樑之任邊陲籌策久預參謀軍國平章更宜宿  
德大功旣建足占真相之符自遇不凡仍若少年之志  
某等曾趨帷幄同隸帡幪祝黃耆之無疆合蒼生而共  
慶回憶臨江鼓角同欽景倩之登仙請看綠道香花猶  
爲使君而禱佛先憂後樂偶陳絲竹而何妨積厚流光  
定知台衮之相襲不僅聯珠集在但延文種以娛親尙  
期三到碑刊始沐 恩光而入相

盧后山制府六十壽序二 代

聖天子御宇之十有一年四表無塵 一人有慶乾清  
坤謐漁讓耕推則有趙營平之方畧杜元凱之功名文  
淵據鞍笑是翁之矍鑠庾公連榻容老子之婆娑羊鉅  
平之鈴閣翛然呂蒙正之壽觴宜舉臣惟法

主各膺洪算於 堯年兵以衛民同享遐齡於 皞歲  
令公壽考潞國耆英若我制府盧后山先生者其庶幾  
無愧已惟先生任本棟梁器同干莫門未列戟家惟積  
書長文必興其宗宏微乃嗣於叔憲章法服夙推創制  
之材楨幹楷模不愧儒宗之譽早聞登第已賀得人共

論官材爰司武部卽周知其地域時獨省乎文書姚崇  
剖析實當兵機李愷鉤稽爭推吏幹辛公義之奉國誰  
似罄心裴光庭之在官衆皆稱嘆遂由戎府出典軍儲  
旣轉饒於湘中旋備兵於嶺外繡衣北返絳節東移水  
溢桃花河完瓠子更提刑於楚北仍司臬於渭南遂總  
師干特巡山右類皆俯垂 清問綽著循聲色正芒寒  
邇安遠肅常袞親加講迪一變頽風吳湊自矢清忠四  
騰美譽與知名相遇有鏡湖秦望之游以澤物爲心窮  
絕島荒崖之跡指授各勝其任規爲特過於人弛酒茗  
之權而貨貨亦充投犀象之珍而器用敢飾返居廬於



北地值乘障於西陲轉輸特命寇恂警捍均勞韓滉  
道誰踐糅用豈空殫車船如飛蹊隧特險詭如士雅或  
棄布囊勞若宗仁恆衣皮袴燒石剪木豈虞通利之難  
重山複江同嗟扞鋌之遠儲陽翟而民不知出漢中而  
軍不叛木牛流馬翻輸督餽之從容孔雀珊瑚備極  
褒功之優渥榮班一品遠撫三城張正威名來瑱舉動  
旌惟進善節以詰奸比牛思黯以彝樽錫裴令公之犀  
帶奸賊必死南裔肅然恩信可懷峒蠻如約李涼國雄  
州疊鎮故宅猶存柳孝寬幕府六開得賢最盛韓忠獻  
活飢民百餘萬虞雍公劾大將十二人以禮樂爲韜鈴

以詩書爲法律牙樯鐵軸漁歌遠徹於千村蠶蠱蛇妖  
猺錦爭看其互市遞擁旌於吳會旋杖節於湖中德溥  
華夷歡騰江漢星移物換誰忘臥轍之年邑誦塗歌恰  
值懸弧之慶時惟七月壽屆六旬台輔星明將軍樹古  
下劉宏之教共慶投醪作山簡之游偶聞置酒南樓夜  
夜期秋月而長圓五嶺家家祝春風之復到某等久違  
謦欬實荷生成腰龍笛以無由設玳筵而遙祝八州兼  
督自無慙將相之才萬國來同不僅頌神明之壽惟  
熙朝之元老算比松喬俾閭宇之蒼生壽躋旗翼山長  
水遠歌功德者五百里而同符嶽降崧生爲春秋者八

千年而靡艾更願生生世世偕游  
巢燧之天懸知子  
子孫孫代晉皋夔之職

葉東卿封翁七十壽序一代

夫以蕭嵩修蔣園區合優游以就養張醮同官公輔共  
慶羨其承歡賓客偕來王文獻依然朝服子孫環列呂  
聖功迭舉壽觴固簪紱之殊榮亦庭闈之僅事然而千  
秋作者原期名世之英一代偉人尤重藏山之業倘逢  
葛鮑與論丹井之因緣便到羅浮合飫酒田之供養功  
名業付之兒輩風月共推爲主人本蓬島之神仙臥游  
誰屑傳襄陽之耆舊韻事應增已若我年伯東卿先生  
者握蘭家世懷橘風裁陸慧曉不雜交游王曇首足寄  
門戶博聞舊事朝儀多識於青箱早著令名少作競書

之園扇積書三萬卷策蕭勵而如流高第廿四人當子  
昇而受屈且也員俶固名公之孫刁肅實福門之子陶  
宏景原如明鏡謙謹圓通王僧虔一例烏衣寬和篤實  
卹孀幼拯孤羸或畢世相依或待年早嫁有無供用由  
來骨肉不殊婦孺懷恩非但英雄所保悔偷靈藥期玉  
杵之恆畱足付胡盧任銀杯之竟化金堤鞏固流亡幸  
免於彌年珍塔莊嚴保障原周乎闔省何心獨飽士夫  
未厭糟糠計口平分鄉家與同粟麥以至廟營司祿典  
禮文昌臺築懷清恩隆綽楔宜其看花金埒視草玉堂  
于謹須待時來崔亮終將大至而乃才如李廌遇比劉

賈既屢蹟於大科復難膺乎

特典五臺

巡幸賜宮

錦之便蕃三館追隨寫官書於清祕杜陵獻賦誰拜拾  
遺昌黎抱琴仍入太學延問得失稽合異同經義本精  
禮儀所寄成則例若干卷焉階晉望郎職司武部識通  
理當權重選清姚勗入省本有吏能越公拊牀終當至  
此詳處獨決閣對無遺楊元禮故有家風孔若思鑑於  
止水爰以六旬致仕焉當夫捧敦槃於  輦轂通縞紵  
於東南闔申屠氏之墨莊住春明坊之宅子原推朝隱  
共日書淫讀畫弦詩吟花歎竹言多畢景並賞異乎殷  
臻會總忘年特推崇乎張纘韋華高達恆以風味相期

孔顗詞章共使聲名早立收藏各富衡鑑尤精畧仿碑  
英互徵籀史讀款識而知三代繁文之變考印章而定  
累朝官制之殊日與居稽如觀志傳隸原於古獨證青  
州刺史之言文各不同敢學伏波將軍所詆近獲周鼎  
永畱金山欽法物於前秦示大公其無我是宣王時物  
更古於定陶共王移隱士居旁當比於儀徵太傅歸來  
堂築明誠殆傳集古錄成廬陵漸老藥原特健竹共平  
安閑合署乎散人樂苑同乎上界已臻緝福合享曼齡  
我崑臣同年盛致青雲頌成瑞雨 天子與同筆研少  
年當擁節旄王偉清忠不畱要地韓琦方鎮且建生祠

制度規模盛名方畧婁師德恭勤之選勳名定卜始終  
蕭思話任待之隆州郡厯爲監督乍辭禁藥五總藩維  
一載三遷十旬四職移幢東粵攝篆中丞孔尙書早卻  
珠犀王方慶宜頒錦綵輕裘緩帶殆如羽扇綸巾古器  
精金宜資彝尊龍勺懷親屢賦度嶺剛來孫嘉之之秩  
已增劉子政之書仍讀兒同興世樂聞鼓角喧闐父比  
於陵誰憶文章聲價句傳紅杏原推小宋之才名秩進  
紫薇轉義大臨於禁密維六月下旬之吉屆七袞大  
慶之辰愛日孔長仁風遠播扇持葵葉風流原比謝安  
酒泛荔枝跌宕恰同坡老山明海晏邑誦塗歌慶福命



於三生記將迎兮兩度還山杖屨爭看老子之如仙緣  
道香花且侍使君而禱佛所謂求之不可得推之不可  
去者非歟某等忝同登乎虎榜宜並侍乎鯉庭遠貢蕪  
詞永延松壽有人強仕壯猷宜元老之堂闔宇盛傳清  
夢企耆英之社尊榮似此人人慚寸草春暉壽考不忘  
歲歲祝荷花生日

葉東卿封翁七十壽序二

代

維道光著雍涪灘之歲日月會於鶉火之次爲我葉年  
伯東卿先生七十壽辰時我同年崑臣方伯移藩東粵  
者兩年攝撫篆者半年矣波恬塵靜漁讓耕推開北海  
之尊壘奏東山之絲竹三城之僚案十郡之搢紳檀橋  
生徒蓮府賓從莫不晨趨珠履午醉玳筵祝其餌朮采  
芝因以評松頌柏竊謂老學菴中陸務觀巋然耆舊新  
昌里內楊於陵仍論文章蘇端明初食荔枝葛仙翁豈  
煩藥物雅人原具有深致潤古雕今老生可勿作常談  
標功顯德然而貴徒以子善則歸親簿領湖山五管之

鶯花供養婆娑風月九華之杖履蕭閒請刪絡首之詞  
爰致介眉之語乎惟年伯星辰孕育江漢英靈劉之遴  
是福德之兒李神雋原人物所主鈔八千餘紙誦四十  
萬言麻莢髮而不知瓜鎮心而便起阿士詞藻好事遍  
寫於園亭慧地文心時流常陳于几案而乃標看奪錦  
鼓打迴帆羨蓬山上界之仙作遼海秋風之客碎琴幾  
度壓線彌年當 鳴鑾以西巡仍奏賦而中止手筆合  
酬之瑞錦頭銜慣寫乎寶書文園令且作貲郎上舍生  
宜爲典簿夙知該練參掌禮儀宜荷褒咨編成則例晉  
升戎府銓擇清流後周爲小武藏之官白傅有老駕兄

之贈張嘉貞之詳處辛公義之罄心郎選甚高家風故  
有兵檄未曾填委爭看剖析如流庫仗何至空虛誰曾  
詭祕以答則有朝廷老宿湖海交游早登元禮之門逕  
入龐公之室相與陳局奠爵彈琴賦詩廣購異書尤耽  
祕籍耆賢並在獻酬而真率依然業行俱崇讌會而煩  
憂頓遣業富縹緗遍搜金石務詳款識尤喜圖章獨說  
碑英足稱印藪正籀篆體而準六書部分抉小學精微  
考朱白文而知厯代官階審百僚名氏薛尚功且不如  
其博晁克一當遠遜其精訂職志之僊訛補史傳之缺  
畧近獲周宣王時範金之鼎特置揚子江心浮玉之山

未遇名僧居然畱帶不同杜預惟願沈碑已生平無負  
幽明足匡雅俗量能容乎百輩氣特備乎四時植性元  
和秉心公亮明山賓之篤實激薄停澆謝宏微所裁衷  
分多共少知名業傳于婦孺雜作原等於保庸報誰信  
乎馬牛耗祇憑於雀鼠春明宅住歎儻直之常高畫錦  
堂開惜大材之難用屢當荒歉尤卹寒單平分期豐儉  
之同周給靡親疎之閒駱統與粟誰爲顯名懷人捨田  
庶幾續命所識之窮民無告畢生割宅同居宦家之孤  
女相依及歲輟奩而嫁以至節孝總坊之建文昌新廟  
之成類足揚清合籲景福且也造浮圖七級關全省之

科名復行水兩堤作萬家之保障宜其嶽降崧生孔抱  
釋送我同年崑臣伯仲才如兩陸譽比雙丁或載筆於  
槐廳或著書於薇省卯君遷擢原稱黃門處默清廉早  
蒞香浦都典一方敷歷七鎮崔湜之年誰及蘇亮之速  
不嫌賢比長城選極開府有勛方岳宜滿寵之久居出  
撫藩封洽應詹之惠政韓雍方畧便斫大藤新息功名  
常餌薏苡果青州之全活遠勝中書信大范之曾欺真  
猶老子安車駟馬紫綬金章恰爲度嶺之游共愜躋堂  
之願記六旬之壽日曾到長安知八座之佳兒定爲台  
輔著羽葆霓衣而登陟何知霜雪盈顛與赤刀陳寶而

流傳誰謂雲烟過眼某等幸叨年誼宜進壽言知陰德  
若耳鳴聽遠謨而踵企余崇龜之佛似咸頌使君郭元  
振之親存定爲宰相朝衣恪侍誰知兼督八州籀史親  
摹同羨當今無輩合蒼生而教孝居然皇古之隆平偕  
元老以祝延倍嘆是翁之矍鑠

葉東卿封翁七十壽序三代

夫山分泰華實盤陘于崑崙河合江淮總導源于星宿  
是以朝衣恪侍保衡登王祚之堂奉酒極歡歲節詣張  
黼之府楊嗣復曾知貢舉生徒合讌於座中張文遠業  
督軍屯將吏拜迎於道側由來儒雅不羨浮榮原屬尋  
恆無煩醜縷若乃范文子入朝能讓韓舍人疑獄倍詳  
郭代公獨有親存范希文夙知子善誰如總得張安國  
得老人修書輒候其封題呼以使君聽政待觀其斷決知  
此後無慙令長任作公卿看兒曹共整乾坤且談風月  
端由庭誥請述俚言若我葉東卿封翁者繡豸清門石



麟令子人稱學府世號書樓楊方爲一國所推袁淑固  
當時之冠坐經積歲牀銳減以彌勤讀至中宵鐘遞鳴  
而或限張河間之作賦精思乃至於十年褚世舉之爲  
詩立奏不踰乎三刻而乃徒誇警策莫與巍巍往還賸  
歸燕之篇懸絕看神龍之化五臺駐蹕快觀 時巡  
多士迎 鑾爭思召試才能奪錦 詔許鈔書特援  
恩例以換頭銜果執古經而代手版韓持國之靜退甄  
錄宜加樊紹述之才名議論可據成則例若干卷焉即  
官清選侍從美才參掌兵樞實司邦政馮子琮曾閱簿  
領閣對豈有遺忘裴光庭原寡交游公務釐然修整辛

公義罄心而奉國楊處道稱嘆而拊牀官是縉雲仕同  
止水蓋太翁自此遠矣訪文章之宿老寄風雅之總持  
魯國靈光倉曹人物韋華之待寇讚雖異年時沈約之  
遇王筠轉傷疲暮謹譁譁聚名流懼服乎崔懷進止威  
儀舊事諮詢於范岫劉畧班藝之繁汲郡孔堂之古任  
昉率多異本紀瞻仍喜自抄求訪殷勤讐校精悉尤嗜  
金石兼收印章市皆相國寺之碑文論有樊榭翁之絕  
句篆籀宜高文大冊徐鉉言精圖書皆美玉良金衛宏  
說當分明世次足訂諸賢小學之書羅列公私反疑全  
史百官之表周宣王時寶鼎猶在古潤州地金山屹然

喜夷氛盪平以旌功祈佛力呵護以存古此又缸面酒  
之賺蘭亭迴殊蕭翼玉鼻騂之存公據同笑東坡者已  
德進乎日物與爲春仁人舊曰荀何長者世稱婁郝陰  
陽自化寒暑俱忘樵偶落而必還草非時而敢殺行誰  
遺舊量本逸羣智豈園丁張循王卻令回易親非殷叡  
謝宏微屑與爭財惟善遣以微詞庶復完其舊業以至  
邵成子與隔宅居永憐孀幼鍾離君嫁前令女實費推  
等一塔干雲重建而題名者愈衆兩堤捍水並修而托  
命者無虞建節孝總坊僻壤均勞其採訪葺文宣遺廟  
新堂咸誦其畱題屢值凶饑均先賑贍徐陵給粟荀彧

揮金許靖英才人已轉分先後士謙遺惠農民永撫兒  
孫所以慶鍾連璧美紹雙珠均推廊廟之材並荷門基  
之寄我崑臣中丞賦擅凌雲文工請雨在朝顯選常舉  
王修名輩循階偏如伏甌厯居方任屢擢全藩宏總上  
流鬱爲時望崔挺具籌邊之畧何愧擁旄王恭有任事  
之名固當假節地原要害人知罷戰之期政務懷來敵  
畏推誠之雅庾翼穆然深遠戎政皆明劉宏每有廢興  
人心咸悅介弟以神仙職掌益進清班太公以耆舊風  
流爭期遠至誰攜藤杖同迂板輿羽葆霓衣素琴石研  
相率塗歌邑誦民儘知恩頓忘水遠山長父先垂誠昔

者西安萬里六秩初開此時南極一星三城普照時當  
季夏壽屆七旬仙儘堅牢窩原安樂烹龍炮鳳卻兼菹  
菜之香讀畫弦詩宜並荷花之壽有兒開府功名標銅  
柱以長存何日還山登陟度鐵橋而久住某等忝屬同  
官分居後輩歌徵白雪爵勝青霞待獻范蠡之圖爭吹  
李委之笛畢生教子定如桐木名家四海知公原爲離  
支度嶺緣深如此仙翁疑蒲澗重來善總歸親哲嗣享  
麥邱三祝

聖主錫金章紫綬蕭閑如文籍先生佳兒比龍勺彝尊  
定省卜太平宰相

葉東卿封翁七十壽序四代

著雍紀年林鍾旅月爲我葉老大人東卿先生七十壽  
辰時我崑臣先生移藩東粵攝篆中丞共結耆英社於  
花田宜開慶老堂於蒲澗曾知樞密待賓客以同歡如  
返新昌合生徒而著咏張居業喜山川風物林榭欲營  
呂聖功有花木園亭壽觴迭舉寇萊公之大宴合作山  
棚王文獻之重臣敬披朝服陸大中之至同聽絃歌好  
時候之家爛然金紫古今同豔族黨交稱原大雅所弗  
欽豈高賢而屑道若乃遠謨傾聽口碑實始於庭闈法  
物能銘手筆共推於朝野葛稚川之位業全家宜供養

神仙王新建之功名老子且婆婆風月求之近代殆罕  
其人惟太翁烏府風裁龍門名譽對工孔雀望重麒麟  
袁峻寫書王摘隸事范雲秀雅輒推卿相之才張率遲  
迴且譽東南之美刮磨淬厲鑽鑿推求盧元明如此風  
神王珍國應堪大用復能太和爲表屈已自容妄言則  
記謝一縑隆禮則步懷三版文饒洪量闔拔勞謙高允  
惟任理栖遲蘇綽實爲人寶貴交親祇存孀幼居停則  
耐久依然闕閤忍置使令贖取而待年始嫁業守韓康  
之舊欺同子產之方分財則鮑叔何知竊藏而晉侯仍  
見以至永築堤而捍患事本急於然眉重建塔以延庥

功可成於彈指彤管貽而房幃遠特蒐羅以先立總坊  
青衿刺而學校存爰倡率而聿修文廟頻經荒歉通共  
有無獨解帶而置庭仍將錢而入市全琮齋數千斛米  
亦祇空還鄭太有四百頃田何嘗足食宜其

帝稱知己臣賀得人羨孤進之還丹喜英雄之入彀而  
乃屈聲屢振前字難添喬彝本甚崢嶸宋五相譏坦率  
駕幸五臺之盛典詞高一座之全才獻有頌圖酬之  
錦綬 召試難膺乎異數傳鈔僅尾乎末僚世儒何愧  
人師典簿均兼書庫樊宗師之據古力學早已兼通王  
庭珪之在官論事本無不合例進名郎職司戎政李景



武夙稱於楊素杜正倫實薦於魏徵權重選清周必大有題名之記吏煩民緩趙孟頫有增鈔之思給地而苜蓿誰餐還山而赤松可擬久居畿輔特重交游詞章爲天下所宗品藻待儒林之丈人如郭太同仙侶於舟中客是孔明拜德公於牀下陶潛嗜酒半道相要宗炳撫琴衆山皆響儲藏益富讐校彌精送抱推襟懷鉛握槧收金石購圖章籀篆文殊官私用別安得碑英第蕭世誠之創格不同印史爲朱行學之廣書固可證八體之源流考百官之制度焉周宣王鑄鼎之年人同虎拜裴頭陀獲金之地寺曰龍游昔所珍奇今偏割捨庶使龕

同彌勒低眉結香火之緣何如坊住癸辛過眼纂烟雲  
之錄我崑臣先生廊廟之器端揆之才刁雍原自福門  
杜預羣推武庫中與方伯誰如荀羨之年平北將軍僅  
擢王恭之望南州冠冕一代楷模誰夢鎧以進階特持  
鞭而况節得賢爭赴書同十郡之榮接物淡然選極一  
時之雋令狐整大宏恩信渠帥敢違田畱安悉泯異同  
疎遠無間難弟以薇省清班剛從內轉太翁以香山遺  
老忽愛南游猿鶴追隨魚龍輦護籌邊正暇度嶺徐來  
茉莉燈明荔枝酒熟翛然笠屐仍比東坡太古尊壘特  
宜原父鳳銜書而早至塵作扇而誰貽縱雀鵲而沿街

戴貂蟬而盈座維祝延之兩度四海盛傳仍考古於千  
齡前生清福某等備員五管實隸崑崙供職三城曾邀  
眄睠敢同芻蕘聊學匏宣第攄下吏之忱同祝太公之  
壽荷香初透更邀生日主人槐蔭方濃定卜他年白輔  
郎君官貴恰如葉盛威名宰相親存艷說襄陽耆舊此  
日話雞窠於瓊島書海錄以同傳他時扶鳩杖於 彤  
廷隔屏風而並坐

葉漢陽師相五十壽序一

代

維柔兆執徐之歲月在仲冬爲我漢陽節相崑臣葉公  
五十攬揆之辰封翁東卿先生年七十有八矣夫恆言  
不稱老方當戲綵以承歡而有善則歸親仍喜添籌以  
卜算又况望隆分陝功著平淮萬國懷柔兩朝開濟天  
生李晟爲社稷之隆平人信希文荷朝廷之責任八州  
兼督仍當愛日之年一代宗臣恪侍懷冰之室參萬幾  
而秉鈞軸親尙康彊總百辟而舉壽觴人爭慶羨宜其  
彫霞鏤月頌柏評松笙磬同音蘿袞齊列同申兕祝詎  
可無言然而口碑流播部民議建生祠手奏傳鈔國史

預畱佳傳瑣聞軼事定載叢編邸報公移便同年譜辭  
當徵實義不取諛請談盛德大業之隆遞誌絕倫軼羣  
之美可乎惟公皋夔人物江漢英靈嶽降崧生孔抱釋  
送依雙親而廬墓孝子家風嫁孤女而輟奩福門世德  
身入獨行之傳貽厥孫謀耳鳴陰德之言授之庭誥內  
行淳備人無間言陸瓊夙荷門基蘇綽實爲人寶徒觀  
其蔭同暘樾節比秋花無功而恥効承平何諱而不陳  
早潦富惟積卷夢有諫書解金帶以拯饑盜銀杯而掩  
過儲賢材於夾袋問疾苦於征輶司馬文正之生平兒  
童所共悉諸葛武侯之謹慎

宵旰所夙知原所優爲猶然常度若夫氣志如神範圍  
不過垂紳正笏而東南之安若泰山伐鼓撻金而嶺海  
之望如慈父殲遍海隅之盜賊而審慎用刑調半天下  
之軍民而艱難籌餉星辰搖動雷電經綸大德曰生惟  
仁者壽至謂尊榮已邁於等倫出處同敦乎孝友謝康  
樂池塘得句頻夢阿連蘇長公風雨對牀輒思子季返  
自聽潮亭畔代攜拄杖而導輿歸從鎮海樓中未脫戎  
裝而視膳察微知著作作善降祥其不可及者一也溯自  
淵源家學丕振宗風遍通書幣於乾嘉實捧敦槃於畿  
輔鄴籤廣購文讌偕來流觀泛覽之餘殫見洽聞之輩

紫薇省裏足參校其儲藏策竹堂中或抄存其目錄公  
乃目下十行手披萬卷胸羅列宿口吐明霞賞奇析疑  
耕道獵德沾漑流風餘韻推尋大義微言宮體偶傳朝  
儀諳練書疑未見讀從東觀而何妨文譽翕然問彼西  
廳而不必感士卒則文移剴切宜代王言憫農人之篇  
什流聞足徵相業舊傳經學師丹不愧儒宗合是詩人  
高適哀然達者千秋鑑在張曲紅之事主可知一品集  
成李贊皇之籌邊畧見疏陳十事表獻六箴非僅達於  
樞廷總無煩於籤室以至行營羽檄遠道魚緘傳觀如  
與面談代寫幾令腕脫又若雜家所錄衆技之流星命

陰陽壬遁識緯尤爲餘事亦復參稽所以劉瑑授官曰  
煩親擇曹瑋料敵事宛前知偶賦車攻皆逢吉日彌增  
士氣不鑿凶門漢有北平明惟誠意或可侔已其不可  
及者又一也惟公高掌遠蹠兼聽並觀筆若風旋符真  
火速智珠記事而洪纖靡遺心鏡燭機而表裏洞澈案  
無畱牘道有遺衫憶褰帷於晉秦復洗印於吳楚卽奉  
渾南之

命旋爲江右之行暫移藩於甘涼旋剖符於 輦轂迨  
旬宣於東粵暨亮翼於中台莫不遺大投艱愼微謹小  
殆迎刃而輒解如擲梭而敢停榜片紙以期民盜一錢



而察吏耳目誰能假借風謠尙屬謬悠如日月之代明  
殆鬼神之來告稻掇還而遽責誰諒幼童柳移種而能  
欺先妨惰卒運猶百璧惜分陰而敢闕橫任孤舟濬巨  
川而共濟神明散朗智勇深沈縱澶淵孤注而敢爲卽  
周禮六官而弗泥若操利劍惟斷乃成如理亂絲當斬  
而已水活鱗舒風高翼大仍運籌於南庫宛借箸於中  
朝支拄七年維持全局輦車驅駕裕鄰省之捐輸火艦  
風船助長江之戰守斯人用舍繫君國之安危吾粵又  
安憫寰區之饑溺劉晏恐輸其材具韓滉畧比其忠貞  
其不可及者又一也英清肇亂衆原烏合寇乃鴟張蛟

涎暗吹虺毒潛扇駐戎韜於禺峽馳兵檄於滇江賊冀  
生降軍殊死戰燕巢幕上邱遲屑令遺書鼠鬪穴中趙  
奢仍勞決策賊非枉死便作佳城將是飛來偏同古寺  
尸橫石棧血漬花阡千村酬寨將之祠列戍撤梅銷之  
壘羅鏡之役我軍已疲公乃雅歌投壺斜簪散幘戎幕  
之旌麾已換節樓之笳鼓不聞豈有怯時原非詭道李  
牧饗士日令椎牛曲端點軍誰許縱鴿大藤峽斷好官  
員戴月而行細柳營開眞將軍自天而下捷同嶠底交  
推馮異之功勲險似壺頭曾致馬援之嘆息紅巾之亂  
烽火遙連於兩郡戈鋌直抵乎三城虎口忽張豺牙密

布彼矜破竹此誤爭桑各各蠡屯村村蟻附公則審幾  
獨斷聞變不驚山嶽轉移風雷感召飛芻輓粟具有章  
程紗帽隱囊翛然鎮靜忽驚飛電迅掃妖星南海冠裳  
匪何真而可任北門鎖鑰非冠準而不能建大將鼓旗  
淮陰善將錫諸侯弓矢重耳專征七縱七擒八戰八克  
後發先至十圍五攻先靖城闔次平墟落隨收汾水乃  
復端州合省安居全軍釀賞陣非背水十旬摧佛嶺之  
營閣兆凌烟三月下軍樓之榻錦裘輝映銅鼓鏗鉤鄭  
重徵詩商量免胄功收淝水謝太傅之局度夷然績頌  
貝州文潞國之精神彌厲南裔重來新建宜令八寨之

平東征竊比姬公奚俟三年之久其不可及者又一也  
島夷緣合市而來疇昔有人城之議公以虞舜書稱猾  
夏江統論著徙戎雖中外一家而華夷異類謠蠱有毒  
豺狼可親隱憂縱不在於蕭牆旣睡究難容於臥榻非  
夙約而奚爽詎舊盟而輒寒恪奉

威靈凜遵條教市非移於梁帝舊峻防閑門似賞於祁  
班外輸征稅鎮定誰如李靖原比長城逡巡卻憚王商  
共推真相重闔洞關森嚴畫戟銀刀巨舶駢羅消息明  
珠翠羽紅巾焰熾懼蠻貨之侵凌環獨檣船名而守望臣  
知體國彌切憂邊眾議借兵方能禦寇獻火攻之下策

爲水戰所亟需獸艦如飛無難決勝狼機最巧較易摧  
鋒且謂漢時開創曾用巴渝唐代中興屢煩回紇呼韓  
永爲外扞党項願作前驅懾之以存亡爭之以去就公  
獨持讜論不慄危言色正芒寒慮深思遠惟

熙朝之神武足駕馭乎梟雄况重鎮之毗連早提防其  
桀黠但求蔬飯慣騷擾於閭閻倘議金繒任度支於府  
庫虜情叵測物防先腐而蟲生寇難已深事憂前拒而  
狼進當虞惜指而失掌奈何剜肉以醫瘡決不兼行事  
旋中止而卒之師抵石門樓船早辦界標銅柱交趾帖  
然相逼素憚然犀自衛偏令放虎嬰灰箭火羣盜胥平

羽扇綸巾諸夷羅拜邇來翻覆欲肆憑陵舵逐潮高烽  
隨星落公出入彌謹勦撫兼施鈴閣寂然臣心似水鏡  
門有限軍令如山任戰象之走林學老罷之當道匪獅  
兒而共避異燕子以能飛此其不可及者又一也繫昔  
渥恩初被早譽商霖重任相推同吟喜雪宜其職兼二  
府禮絕百僚外總師于內司台鼎恨無官以酬太尉將  
舉國以聽夷吾而乃十年踰嶺七度遷官未命還朝仍  
畱督粵功被四海名振九夷輒予羊元保以好官定知  
顏真卿之何狀求賢良於夢卜想像虛無見褒鄂於畫  
圖丰姿颯爽聞百職庶司之相賀邊徼無虞宜宦官宮

妾所不知

君王未識

慶稱觴於解署遙賡虎拜之詩

覽補袞於封章倘有鴻飛之慕龍雲契合魚水歡聯兼  
股肱喉舌之司似嫺戚交游之好君臣千古遐邇一心  
其不可及者又一也我

朝封爵之寵榮半屬從龍之俊彥苴茅燾土礪山帶河  
厥後文臣鮮膺懋賞或如張良翊漢遇畱眞作帝師或  
如微子歸周封宋稍存客禮所以保衡教胃禮極崇隆  
使節行邊體尤雄峻 特賜雀翎之貴榮兼鵠印之多

縱蒙破格之殊恩猶率酬庸之舊典乃以防夷績茂  
卻虜功高位列九儀爵班五等吞吳未決有鉅平貴將  
之材興漢比隆增高密徹侯之秩油囊大槩公袞貂冠  
威懾百蠻慶流萬禩功非橫草沐鴻慈於郅治之  
年潔寓執蒲歌燕喜於太平之國蕭何作相益擅勛名  
丙吉安邊原宜勞勉其不可及者又一也自昔預棟梁  
之選多享遐齡荷鼎鼐之司例臻洪算是以召公作誥  
壽近期頤衛武陳詩年登大耋漢唐以降史冊能徵公  
則纔踰彊仕峻擢參知始屆服官旋正端右台司曠典  
元老壯猷調傳說之羹杯辭獻壽曳尙書之履杖備延



年儀望俱華終始無玷報惟冠雀須知楊寶之賢超似  
阿龍同學桓彝之嘆道明入相未換黑頭裴度論兵依  
然元鬢合省方祈其壽考來日具瞻遠夷爭問其起居  
妙年端揆辱和魯公之特賞偏居付鉢師先薦陳文惠  
以同升難說捲簾人老其不可及者又一也攷爲相而  
親存唐惟元振紀封公而父壽漢有張酺地足優游蕭  
嵩蒔園區而養志客勞起避王漙衣朝服以娛親殆主  
組之殊榮原帟帷之僅事我東卿先生襄陽耆舊魯國  
靈光門才爭詡常楊家法凜遵韓穆稱詩才高於七子  
載賦名達於九重遲唾手之功名趨翔耶署傳等身

之著撰寫定禮堂近以懷親篤摯隨子蕭閣啖荔子以  
難移永留海嶠看梅花而有約慣夢羅浮五鼎香初一  
經燈下祝融偶謁訪碑黃木灣前勾漏誰求尋劍丹砂  
井畔才如宗懔但記荆楚之歲時學倍嵇含僅狀南方  
之草木蒟洲覓句屢話蘇齋訶林註經偏類虞苑昂佳  
兒而破賊文同驅鱷而總焚保率土以祈仙錄異驂鸞  
而待緝妙高臺上德雲前世因緣老學庵中放翁暮年  
撰述萬羊作饌膳比蘭陔之馨雙鹿畫輶御似板輿之  
樂伏元度有言作父如此定何如也其不可及者又一  
也繼配汪夫人名卿家範淑媛閨儀賦茗才高攝桑業

勵連環輒解封事能知笑山巨源以度相推決薛仁貴  
遇時乃發作羹湯於厨下執饋誰辭獻襪履於堂前襲  
裘仍問朔風釀暖南雪添寒慈竹平安檀欒子舍孝梅  
富貴橫斜養堂人如龍勺羹尊地本瓊樓玉宇擁圖書  
於暇日武惠休兵樂鐘鼓於清時元獻饗客某等均荷  
陶甄辱襄化理舊時冠劍待拂埃塵此日笙歌止談風  
月園惟獨樂巖有退思進金爵以祝延書錦屏而道懿  
揆文奮武開國承家紉福曼齡夔絕今古入座誰徵花  
瑞掃門願託槐陰祇傳鸞掖之文章僅話雞窠之年歲  
王海日婆娑老福兒郎未陟於崇班張江陵整頓廓清

臺諫敢滋其浮議以今方昔殆比積薪已金馬集經  
乙覽名同不朽之期石麟降協天心貴在未生之日罕  
聞橋梓南來同作神仙尤頌韋平中年亦登台輔

葉漢陽師相五十壽序二代

維咸豐六年冬十一月爲我 宮保爵帥中堂漢陽公  
五十誕辰距道光二十有八年夏六月 封翁東卿先  
生七十誕辰九載矣昔陳堯叟之稱賢殆緣父教郭代  
公之作相豔說親存然而石奮滌中帟而紀孝臣豈邊  
才王溥衣朝服以承歡父慙公望舉壽觴而人爭慶羨  
張孟侯非有大勳居政府而親尙康彊安厚卿實多慙  
德譽後來之獨步父豈知名作平世之三公誰堪錫爵  
諸葛恢以黑頭人相未著武功裴中令之霜鬢論兵似  
嗟遲暮若乃材兼文武望重華夷昔賦懷親篆初權乎

撫部今聞破虜位久正乎台司學綜天人榮列五等位  
兼將相仍督八州黃閣妙年復圖芳於鐘萬板興極樂  
兼頤志於丹鉛子孝臣忠 國恩家慶固當今無輩亦  
從古稀聞已維公石麟叶瑞辰象降精不徒荆楚之珍  
夙推廊廟之器家範恪守庭誥永貽才人而倫紀克敦  
烏臺望峻老輩之儲藏特富冰署名高旌孝子之廬歸  
然遺廟撫故人之女不啻所生原是福門篤生上相觀  
其文史足用耽味道腴挹萬卷之菁華本六經之根柢  
畿輔之鉅公捧手三世才名東南之流寓傾心一篇碑  
誌飛騰綺麗上下縱橫采故事於古今綜異聞於聖哲

辭空明而盥露氣飄蕩以凌雲錦段不還玉杯同著摹  
遂鼎之款識珍重編摩揚石鼓之詩歌精詳攷訂師丹  
佐漢業擅經生杜預平吳學推傳癖人如蔡義善說韓  
詩文似班彪當成漢史所以殿前作賦文愈常楊輦下  
稱詩名齊王李王曾行卷詠梅之篇什交推李泌薄游  
煨芋之因緣可證民歌廉范人望謝安 九重知草奏  
之虔早卜平章雨沛十道蔭征輶之福預占台輔星明  
宜其材振四海功蓋一時度越蕭曹盱衡稷契善謀能  
斷實兼元齡如晦之才應變守文乃合朱璟姚崇之量  
魏公舉措時繫安危忠武生平 帝知謹慎猶且集思

廣益兼聽並觀膀片紙以期民盜一錢而詰吏談言微  
中能令韓滉霽威勳望豈宜仍慕魏徵極諫 寵眷益  
隆年華鼎盛告成功而元圭錫命膺備福則金冊推

恩班聯保輔之尊榮位並公侯之雄峻未扶鳩杖禮絕  
百僚仍 賜雀翎威懾萬國知韋皋之鎮蜀丞相後身  
期郭令之興唐中書迭考然而効葵藿而 恩深益殫  
心以謀國靖荏苒而政猛尤遺愛之在人讀故里之牋  
繒感激則維桑倍摯紀重臣之勲業流聞則罄竹難書  
試因內修以及外攘且畧文事而言武備乎粵東素通  
市舶本隔城闔島夷梟獍同生犬羊實類口如石蜜心



匪丹砂謂中外之不分冀出入之無礙本羈縻其勿絕  
竟荒忽以偕來豹胎易成魚目將混慮深思遠遺大投  
艱忱之以威靈說之以利害示之以果毅喻之以懷柔  
虺毒潛消鴉音頓革分茅嶺隔宛然銅柱之標細柳營  
開豈有缺門之限綸巾羽扇曾未論兵紫貝文犀依然  
合市近聞蛙怒復肆鴟張六步倚弓七門當戟雷霆殷  
地烽燧燭天錦帆颭閃平三城銅礮鏗鎗平百里公獨  
神色不撓談笑自如戰守俱能勦撫並用李臨淮之靴  
內反笑藏刀王儒仲之尊旁誰聞著箭將似伏波橫海  
方知道路之難時經朔雪炎風永賴忠良之翊鄭從讜

舊倡正議原極尋恆虞彬甫宜立大功奚相慶賀寇平  
仲以朝廷無事鎖鑰權司李贊皇於邊徼練知畫圖何  
必粵東羣盜蠡屯蟻附鯨鯢偃蹇狐兔披猖五管蔓延  
千村萍合鋸牙鈎爪放命游魂虎負嵎而敢攫象走林  
而習戰景丹臥鎮足抵長城岳侯飛來定斬劇賊公乃  
馳羽書而卽發建華鼓以專征縱鴿誰知然犀洞見檄  
先禹峽劍及羅旁甲兵原貯於腹中險要若觀於指上  
馬服君之料敵關與當平文潞國之視師王則易破襄  
瓊不事未如劍外之難吹笛曾聞舊比壺頭之役糾虔  
墮落搜剔林淵塵靖波恬邇安遠肅甲寅之亂衆仍烏

合欲肆鯨吞虎狼逕伏於庭堦  
蟻乃作於懷袖羚羊  
峽外氛祲冥冥獅子橋邊風煙的  
的水通灘瀨地逼番  
禺禍起花田繫連石井鶯岡賊壘  
漸移雙塔廟前麟閣  
人材合住五層樓上激昂論衆持  
重安邊鎮靜如常精  
詳無比彤弓盧矢早 錫賢侯霧  
閣星營巍然重鎮飛  
芻輓粟伐鼓撻金僅閱十旬殆經  
百戰若淮陰之善將  
比李牧之治軍奮怯完殘遐邇安  
撫初聞卻敵遽慶殲  
渠走魅奔魍蕩海夷嶽旋擒方臘  
遽破楊么兩郡謳歎  
七洲澄晏薦謝元而淝水捷散幘  
斜簪任李愬而蔡州  
平腰鞬佩弭陶威公之綜核曹武  
惠之蕭閑生李晟而

社稷又安相文正而公卿交賀永留藤鼓功名遠過韓  
雍並卻柳瓢才操殆踰葉盛先憂後樂兼如小范之知  
兵近悅遠來俟謁宣尼而問政我佛山謬稱繁富之區  
實作逋逃之藪乃蒙披艱掃穢熏穴剖巢謀若鬼神來  
同風雨旌旗變換刁斗森嚴禍本釀於燒香勢幾同於  
破竹旋開毒霧盡掃妖星望葉公之來真如慈父羨沈  
光之勇原比飛仙巷有弦歌農安耕鑿恩深渤澥德重  
嵩衡固不僅若芳田雨潤而孤花倍覺其淋浪大野風  
柔而叢篠亦知其駘蕩者矣東卿先生竊比老彭居然  
服鄭鼎祠餘慶笠屐閭緣昔王文成父海日老人自署

鄉閭錢明逸羣推餉序獨是口碑載道奚俟徵文總集  
編年如親訂譜靈均初度謂嘉名肇錫而已諛上相篤  
生占明日中元其亦偶絡首之辭弗尙介眉之語特陳  
請核不朽之端倪以識不忘之頌禱乎爾其董常幼達  
張霸饒爲便書高密之碑輒改蘭成之賦令人畏服與  
我周旋手則縱筆千言胸亦積書萬卷王摛隸事勝何  
憲而靡窮思道爲文示劉松而不解當今無輩後進所  
宗何至因循都緣逐北而乃盛德絕倫人言無閔皇侃  
至行日誦孝經阿稱小時人呼曾子叡明禱疾冰不溜  
而覺寒子約居喪風倘吹而卽倒許散愁之在世足以

自資劉懷仁之善交去其大甚經傳昭之戶寂若無人  
館范鎮於門不知帥客劉善明少立節行沈曇慶果無  
材能篤實謙和時稱長者施爲動止足法後人澄與潛  
其可量寒或暑而俱忘豈必年高極樂同乘輒還怡然  
世與共財異門誰作陶宏景圓通冥會遇物了然崔光  
韶雍穆孔懷平談若厲竹笋取而烏能廣施桑甚落而  
仍遣拾還人孰可卿地原不競投書相告置於靴而竟  
焚妄語安能謝以縑而難記其不可及者一也三唐詩  
派合初盛晚以稱工百粵詞宗繼屈陳梁而崛起仙風  
遠希乎大白家法仍守乎曲紅直追漢魏以還並及韓

蘇以降心源實契乎老杜體格兼仿乎遺山小雅變聲  
離騷遺韻懷仙諸作吳梅村且遜其清英也詠史諸篇  
李文正亦輸其藻拔也求之當代直新城秀水之間限  
以嶺南亦湛若簡民而上銅琶鐵撥素練輕縑碧海長  
鯨丹山老鳳黃鐘大呂龍勺彝樽劉隨州何憚偏師虞  
伯生原稱老吏率其胸臆固是一國所推少有才名業  
以古人相比所以捧敦槃於輦轂迭主齊盟張旗鼓於  
東南誰當勁敵加以顓門業擅蓋代才雄雅善古文仍  
工儷體沿六代以下窮乎南宋仿八家而上溯乎先秦  
富艷難蹤汪洋自恣賦筆有哀江南之麗碑版若平淮

西之邇代不數人殆無餘子質不宜慕謝康樂旣非所  
長用乃過多任彥昇益以爲病建安風骨幸免子桓所  
譏武定軍書誰誇伯起夙構外至倚聲妙契乎三李染  
翰閔師乎二王紅牙拍偶與評量白練帚咸知寶貴苟  
分才技了結十人獨詡辭章光芒萬丈其不可及者又  
一也說經不窮戴侍中更相難詰時輩所與范長頭當  
問威儀武帝果聞謂休源爲獨誦四公有助見張譏而  
凜然鑽鑿推尋實事求是楊方公事稍暇輒讀五經吳  
萊天資過人日易一帙迫歸田之已賦仍仰屋以不疲  
白首彌勤雌黃可下向朗不干時事稍謬誤而輒刊譙



周頗曉天文更研精而欲悉沈吟竟夜特懷抱筆札以  
專思不出經年豈吹彈箏笛而始慰櫛梳便坐之適兩  
忘李暘躬自補治欲人並重崔浩猶然寢食夢鬼與爭  
世人不盡聰明何由可得天性非爲力强欲罷焉能論  
撰已可等身游醺未嘗離手好此不倦類以相從宋繇  
非兵難之間王苻絕慶弔之禮心之所願豈爲聲名笑  
而不言獨觀大畧寫好書而鎮庫撰野史以名亭奚所  
嫌疑載之兼兩或能增損拌予千金並識亡書當問奇  
字談可名流之助恆祕玩於枕中論爲當世所稱宜寫  
置之座側顧亭林或如其博錢竹汀或比其精卒爲廣

內之藏不愧名山之望其不可及者又一也當夫計吏  
與偕後生同準文辭端如平典詰職掌宜並乎神仙周  
宏正獨有時名王曇首實爲國器第二屑同溫嶠無雙  
果屬丁鴻海內共推山東可抗授李德林以內史極異  
其才遷劉孝綽以祕書當居此職崔光大量無譴咎當  
作司空張率名家以禮律便爲宰相置廣文之館誰爲  
鄭虔覓孝廉之船爭學劉尹亦謂才原優乎百里知卽  
契乎 九重矣旣而餐辭苜蓿寔赴櫻桃學製錦以方  
新問鳴絃其似舊荔支離核以除得葫蘆依樣而畫成  
果鄧禹之笑人豈江公之盪我誰非國士未聞投幘以

能容縱作田居何妨擲鞭之屢拙違執敢侵宗慤典籤  
原可共臨談讌偶若王晞司馬卻非方外其不可及者  
又一也溯自厯兼五縣以迄都典一方知好長官得佳  
吏部餌有紫茄白莧送惟斗酒隻鷺裴俠原獨立使君  
姜謩實太平官府訴蕭景則符真如火誰敢復畱謁蘇  
瓊則將已入雲何由得論捐矛棄戟臥轍攀輿懸鼓時  
聞遺衫不拾問故恐晉平之富求卒難歸去官當芒種  
以前代仍未至日者楚北告靈蠮之警江右遶飛螟之  
災燕子田荒犀牛堰決執圭璧以祈河伯王尊竟以身  
填課餽粥以閱郡民陸績悉能口說此由刺史深自咎

責而靡遑遠勝中書偶能存活而竊幸是以孔顗置酒  
郎基寫書入泰伯廟而愴然聞靖節孫而欲辟子厚誰  
嘲種柳黃門亦喜栽花畫戟清香重簾闌寂同傳遺愛  
均作去思其不可及者又一也范滂懷恨仲舉不止其  
公儀王述齊名義之輒因而自誓竟無祖餞劉中丞致  
書於所親業已乞閒桓宣武得賤而大喜徒步南岡而  
始幸角巾東路而有由若夫坦率均如庾亮丁甯並似  
劉宏與祖希情好日隆謂阿鄴才具故有豈容投版未  
合拂衣是以致仕抑有前聞緣譏杜佑甘言且將遠避  
多笑梅詢何公屑效復還赤松未易輕擬沈約果求謝

事言帶常移郤超特好辭榮費金不吝乃竟投印釋黻  
解佩捐簪星晚露初鷗邊憤外賀季真不爲道士誰乞  
鏡湖之川王荊公歸寄此身語兆鍾山之寺何敢自同  
高蹈匪多病而愛閑非不願作熱官亦久思而爛熟地  
原金粉慣臨水以看花人本英雄特閉門而種菜其不  
可及者又一也然使弦歌歸去聊爲三逕所資老疾臥  
遊難令衆山皆響氣縱豪於湖海助竟得乎江山夫惟  
禹穴曾探故可菟裘竟老舉輿以出載書甚多便作主  
人亦焉知已何至或疑山賊固當仍號水仙憶壯歲之  
輪蹄謝中年之絲竹頻經度嶺過大庾以忘寒尙擬出

山約羅浮而竟到餞離珠海推篷而獨唱晚霞弔古金  
臺命駕而尙乘殘月山塘燈影湖刹鐘聲飽看廬阜之  
雲獨釣洞庭之雪吳頭楚尾頻擊楫以渡江趙北燕南  
特鼓琴而望海孟山人之故里諸葛相之荒祠青原訪  
魯公之碑赤壁度髯蘇之曲醉異山簡屢作習池之游  
嬉樂比羊公尤愛峴山之風景晴川閣敞壯心則黃鶴  
樓高寶月臺空歸夢則白鷺潭近雲霞標寄偏飽經章  
貢風波烟雨歸耕又特訪桂林山水莫不吟先錦貽題  
卽紗籠巨碣豐碑大書深刻漁樵一例猿鶴無慙盛集  
楚關無車公而不樂舊游錄序緣司馬以爭傳去似鷗

閑歸同燕熟山必買而始隱門以杜而仍開其不可及者又一也若夫聲名未立實須餘論以獎成文藻夙優或以風流而見沒諸如季布端藉游揚間者王澄果知風俗年時有異待以風味而原難聞見各殊答以去來而若失乃獨稱爲才子望若真仙團扇寫詩金龜換酒名如望蔡改服以見羊欣貴比中郎倒屣以迎王粲雲間日下相遇可勿常談四海彌天當時以爲佳對謝莊賦隱劉勰書陳勝寇準畱題代常何草奏博於古事訪袁式而典章乃存輒詣清言見寇儁而煩憂頓遣遷除同謝皆盧詢祖爲作表文慰勉深加惟李幼廉恆先期

會卜居少事輒勞嚴武旌麾畱賞未還屢荷文僖厨傳  
以泊新羅使至願得蕭穎士以爲師吐谷人歸業見溫  
子昇之所作圖像於凌烟閣上譜通而更許盟心神交  
如話兩牕中詩寄而宛同謀面所謂逃名而名我隨避  
名而名我追者亶其然矣其不可及者又一也尤可異  
者校文數千見士七十星軺遠洩本出詞曹水鏡高懸  
孰叨恩例惟夙工乎帖括果特借乎梯階分使校而盡  
心望卽知其具眼尤憐罷耗迭許巍峩藥物遍貯於籠  
中珊瑚枝原歸於網底矣值場屋之多故任主司其獨勞  
好腳迹其頓殊別頭試而敢辦深甫實鮮士望在一時



選中郭簿不來漕檄止六人考校自拔盧肇豈俟偵門  
以知敢托唐持未聞降階而伏爲準格亦偶耳竇夢徵  
作賦原佳定臧否而不能房暉遠攬筆便下升沈五品  
敢服主文之衣鄭重數行仍入登科之記書小錄以齊  
列撰後序而見推豔說鴻文曾呈

乙覽旣盛名之不愧連得勝元如異數之倖邀宛然座  
主昔年辛苦五度蕭閑零雨自天亦由嵩少福星度世  
原近文昌矣至謂捉松枝而當塵編箬葉以寫經庭有  
吏民門多將相黃龍觀住特緣釋菜以愜雅游白鹿洞  
開敢學拈花而參妙諦笙歌無伎杖履如仙弟子稱詩

各守梅檀之一瓣門生典試又分桃李之新陰原餘事  
耳其不可及者又一也夫耕妻鋤便稱高隱我黻子佩  
原極尋恆縱恩好之甚隆豈才明之絕異我年嫂金宜  
人族原方雅性特幽閑魏悅次女多識往行前言太傅  
曾孫所則禮儀法度夙承母教自有門風夫人城築以  
論兵壯女軍團而破賊錦繖元戎音徽未沫青綾步障  
叙致彌高所以具食卽祭其不凡隱居定瞻其所服見  
謙之之卒業一日誰停聽叔平之治家十客同遣李文  
姬賢而有智桓少君安不忘危許允尋還預作粟粥趙  
昂守備躬著布韞楊椿名位始終贈郡君其有力王章

朝廷尊貴上封事以能知多所贊匡亦聞參決敢誇能  
解便破連環猶恐終疑卽焚數帖飲大夫之酒試聽而  
無虞遣使者之車躬耕而自足瑤編繡軸紗帽隱囊江  
湖停載酒之船六英釵朶門巷關著書之屋二等金釭  
何曾闔門絕無嬖倖仇覽妻子恪奉宴居甘蔗誰覩其  
側生嘉禾分福以連理比肩人老仍安玉鏡之臺繞膝  
孫多同設絳紗之幔其不可及者又一也六龍清辯特  
許元仁三虎高名尤推偉節厲操特殊戴遂而志業各  
懸持論卽過陸機而詞翰不及或阿奴策下或小者言  
佳縱詡聯珠竊慙腰鼓哲嗣小蓬昆仲名齊二宋美擅

三張保輔之才英靈所聚儼然列宿儘有父風每對惠  
連輒得佳語何減驃騎故有此言並工屬文終將大至  
口辯書記父友咸以材稱真粹才明議者莫能優劣賞  
會文酒竊比烏衣之游酬答話言各有白眉之譽山分  
大小谷住郎君賓客皆同圖籍相慰名譽迭出覺僧彌  
法護之難孝行能齊副金友玉昆之目互相師友同舉  
制科故事宜仿乎草麻別集合名以花萼牀將堆笏里  
儘鳴珂所尤異者三世賢書已詡殊榮於閩省兩番文  
解疊徵雙舉於福門暫屈副車亦誇連壁勝判棣華於  
雨地鉅手何慙箭筈楊葉以連年解頭合讓仍兆石榴

之雙實竹林大有人材不徒仙桂之一枝杏苑齊登鼎  
甲科名盛事縉紳美談對擁節旄各列檠戟並趨丹地  
聯拜黃扉行有日矣其不可及者又一也蕊榜甫開玳  
筵開設客皆樓鑰兒卽張醕紅葉正飛黃花無恙著錦  
袍而跌宕拓金戟以昂藏問一代之功名何如所著喜  
三生之福命都異庸材靈光歸然歲將復始仁張緬及  
百司就列趨  陛分騶話葛洪正兼室登仙還山跨蝶

潘伯霖比部五十壽序

維著雍困敦之歲月在孟冬辰在析木我潘比部伯臨先生五十壽辰光碧堂開耆英會合珮霞鏤月頌柏評

松

僕

以忘年之小友作比鄰之寓公其次壻伍君竹樓

觀察特徵幃語俾侑觴行

僕

竊謂家如陶白罕聞妙解

文章譽井王楊豈必咸躋耄艾流聞藉乎詞翰侈言經濟則已疏藉甚詡其聲華復冀康娛則亦舛由來全福孰許通才請盡斥乎游談庶畧傳其梗概焉惟先生珠服玉饌之家連騎鳴鐘之室而乃情纏典素思極人文或半月而如齋恆浹日而不盥邢邵讐校早徧誤書闕

駟淹通詎云宿讀夙肄大科文字尤嚴繆種流傳特借  
梯階洵爲表式杜正藏自行文軌竟爲釋褐所資孔休  
源方舉茂才乃曰後生之準笑他人之行卷句有鶴聲  
知何日之主文誼傳龜鑑文筆所存詩歌尤擅結瑤想  
於香草濬靈源於浣花玲瓏其聲千疊萬狀詞鋒雅近  
乎玉局文律兼倣乎遺山淋漓寫僭耳之窮慷慨挾幽  
并之氣久已飛翰騁藻盈帙滿笥李益之句天下以爲  
歌辭劉勰所著名流陳於几案法窮義獻妙合歐虞霜  
竹寒松冰河雪嶺豈鍊門之足限猶紙帳其恆懸殿榜  
待暑醉卷氍而卽揮館壁新泥戲取帚而逾妙零縑斷

楮宛然金石之遺大碣豐碑久厠煙霞之古分柳文暢之才藝足了十人兼謝康樂之書詩洵推二寶已當夫卞氏六龍買家三虎咸登蕊榜或上鑾坡使其船換孝廉廷登著作晨并趨於丹地夕聯拜於黃扉得春草之佳語輒對惠連署紅杏之頭銜不徒小宋乃竟武達文通遂憂達樂坦率空傳宋五升沈早問嚴遵偉千秋之業榮於淡墨之書罄萬卷之藏豔比泥金之帖而究之王珣藝擅難爲者反屬僧彌何準名高未減者尙虞驃騎又嘗觀經太學射策燕臺仍夏課而杜門乃秋曹而攝篆一時騷雅昔都官本是名郎七子謳吟外翰林



仍叨妙選徐甯佳士庾元規早悉其有無李重清名王  
濬沖亦期之識會士衡入洛孰問壺盧季鷹還吳詎思  
蔬菜徒以門基欲荷弓冶所貽撫以綏懷之心代厥敷  
菑之瘁麟洲鼠島獨檣任罄婆蘭珠海金山南庫均完  
率稅惟粵嶠之儉歲仰海舶之餘糧特假便宜方令販  
易爰講救時之法更裕活國之章靡間豐凶無勞抽解  
桃花米嗇錯蠻贖以俱來烏柏飯香載飛艎而迭至刀  
耕火種甯待接新之儲蜺牟蠟田不厯俟荒之蓄已且  
也孝芬孝暉恆給吉凶所須元方季方并稱名德之選  
詎聞繆彤之自撾豈必薛包之悉讓賞會無間人擬烏

衣之游詞學并傳或寄鳳樓之作謝混田業委九年而  
有加王騫墅租與諸宅而共佃時或標燈環炭縱酒徵  
歌憐逸興之遄飛撫壯心而未已萬松謾謾瑣圍四  
照之花一水盈盈桂檝盪重輪之月何妨絲竹畧寫中  
年偶盼水天亦供閑話耳德配張宜人閨儀淑令閭教  
虔恭菊豔茗華琴耽瑟好我黻子佩外修內型班宜僚  
少有父風賈景伯足傳門業書聲徹郎君之谷酒波連  
風月之堂卽論清福亦勝羣仙又况寸心早宜千古置  
此身於林藪別有因緣比前代之康王尙嫌寒儉請看  
枝南枝北齊開富貴之花何知水濁水清益漑科名之

徐鐵孫太守七袞開一壽序

自昔通儒循吏史有專書經濟文章人難兼擅曾鞏論  
撰猶或致淵材之譏寇準勲勞曾未讀霍光之傳稱詩  
如小杜容易談兵草檄若孔璋烏能殺賊乃有負名世  
之才擅藏山之業裕籌邊之畧作讀書之官閭廣衢通  
藉東南之保障白蘇祠近證香火之因緣盛德絕倫典  
裁特重倘分餘技僅了十人卽論寸心早宜千古若我  
徐大兄鐵孫先生者固不必餽丹餌石而名始儷於仝  
喬也願相評公而譽始騰於鐘萬也元默紀年黃鐘旅  
月爲先生七袞開一攬揆之辰山明海晏端留著述之

身歲稔人和宜入耆英之社某緬懷舊雨悵望停雲請  
迭徵不朽之三預決大齊之百可乎惟先生家世遼左  
代繼武功駐防嶺南夙勵儒術懷橘卅日然糠綺年陸  
慧曉不雜交游李神儁將推宗主刮摩淬厲鑽鑿推求  
盧元明如此風神徐野民尤精研覽六年不出豈彈箏  
以自娛中宵未眠更鳴鐘以爲限凡夫劉畧班藝之富  
孔堂汲郡之古新章後錄之完蟬斷良朽之缺莫不遍  
探坎井眈味義根方朔誦四十萬言袁峻鈔八千餘紙  
所以顓門獨擅故事皆知申暢滯疑譏評今古經史所  
蓄鬱爲詞章玲瓏其聲汪洋自恣澄波一碧絳霞萬重

抗蹤韓柳導源於晁董之奇騁藻齊梁聆音於魏晉之  
遠率其胸臆固是一國所推傳以精思何必十年乃就  
流聞獨富尤在詩歌合初盛晚而直探樂府之源軼屈  
梁陳而逕抵曲江之壘鵬爭鯨吼颺騰波流閒言兒女  
之情大得江山之助李西涯詠史諸作無以儷其昂藏  
也元遺山感事諸詩無以媲其騷屑也則有 熙朝元  
老當代靈光恆以風味相期特使聲名益振遂乃入清  
翁之吟社歌仲簡之醉樵黃牡丹疊作狀頭石麒麟誰  
與抗手以至好事畫爲屏障諸伶唱自旗亭望重華戎  
名聞婦孺其撰著可謂工矣歎詠之暇圖繪並嫺蘭葉

離離梅花簇簇屢貽雅製特寄閒情耳乃能倫敘克敦  
人言靡間撫楹書而善讀佩庭誥而無忘饋來冬季未  
敢先嘗供有蓮花足徵孝感行齊會閔名儷荀何雷稍  
迅而悲號風偶吹而欲倒量兼容乎百輩氣原備乎四  
時妄言則記謝一縑錯認亦聽還雙屐秉心慈儉植性  
謙和唯知任理棲遲詎屑隨人俯仰朋舊止存孤稚居  
停而耐久不嫌親知業致寒單賑贍則豐穰如故徐偉  
長之恬淡抱質懷文謝宏微所裁衷分多共少求之流  
輩能者誰與當夫孝廉船換著作林間屢赴公車旋設  
講幄四海彌天之譽雲間日下之談對耆賢則真率如

初欽業行而煩憂特遣司徒一面便推國士之交後進  
聚觀輒以古人相比谷永筆札曾客五侯劉繪文詞共  
湊西邸常何封事特倩馬周崔浩朝儀每諮袁式猶復  
清貧自矢孤冷依然軍門乍啟遞吟札而直前鈴閣無  
聲下匡牀而久住錢文僖之廚傳命賞雪而無還陳秀  
公之宦游約觀花而亦預門下爭求溫卷祕所業而不  
投車前誰屑負書讀其文而始重旣而才比鄭虔無慙  
於屈宋敎如胡瑗迥異於蘇湖藁城則合署冷官禮闈  
則仍偕計吏榜書淡墨帖報泥金謂宜獻賦長楊司文  
冊府而乃鳴弦小試讀律未諳竊恐歐陽公之自遣乃

案文書王懷祖之屈臨止脩家具先生乃解劔之官移  
船詣浙不辭煩劇敢嘆悴癯儼若神明誰繙理縣之譜  
總持風雅仍作論蒙之詩龐統非百里之才呂乂實諸  
城之首溯自迭經三縣以洎都典一方務簡績脩芒寒  
色正疾非甄善稱孔奮之清忠惠下討姦表張堪之仁  
恕蕭然儲麥數斛並餉妻兒何煩載蒿一車先弭盜賊  
李藥師之入境長老迎延褚鎮北之在官私僮樵採拊  
循以漸鎮定如常舞文輒令先誅搆訟乃閭相勸是以  
老羸號哭願侯霸之復留閭巷歌謠恨賈琮之來晚日  
者島夷不靖幕府專征轉輸特委寇恂警捍誰如韓滉



修我矛戟峙乃糗糧聚業比於馬援爭不煩於陶侃軍  
移露布原傅永所專司庫仗星羅俟顧琛之詭對丁甯  
款密書一紙而爭傳遷轉因仍藥數箱而必卻練知邊  
事台司且服其謙言素愜輿情黠吏乃歌其清德暨舟  
山之旣復而旋失也鐵軸牙檣輦車驅駕檀江州則米  
籌唱徹貶豈量沙韓淮陰之木罌渡先陣仍背水設科  
防而不虞地險裕儲峙而共慶人歸供釋氏之香花佗  
使君之琴鶴某山遼絕木牛待仿乎武侯隨地謳歛竹  
馬爭迎乎郭伋精明無比相隨亦祇親兵險要夙知所  
薦業爲名將 清問俯垂於朶殿循聲遠播於溫州爰

守紹興殆膺

優錫市獄無擾兵農悅安武帳文弦香

爐畫戟武伯蒼原推極選接物淡然處彬父曾立大功  
領軍交賀於是禮趙穎之高年致瓜廳事思任棠之微  
意置薤屏前勝片紙以期民懸一鐘而辨盜往第歌夫  
楊柳聚已戢夫萑蒲青雀黃龍銅魚銀兔痛瘡痍之未  
復嗟旱潦之頻仍不啻已飢何心獨飽旗植五色糜果  
三盂燕子田耕犀牛堰復果青州之全活遠勝中書惟  
上座之宜延敢薄承事重鎮攬江湖之勝竟夕聞歌緣  
邊當吳越之交經年罷戰至若功均擒盜屑同王濬之  
互爭祿待養親願以播州而相易殆其餘事已我尊嫂

李恭人傳絳幔之遺經仿玉臺之新咏有夫耕妻鋤之  
願符我紱子佩之歌貴而能貧才偏不妒哲嗣伯安昆  
仲五常誰最四皓同稱聳壑昂霄鉤河摘洛比肩人壽  
繞膝孫賢積厚流光卜蟬冕之相襲先憂後樂仍絲竹  
之屏除喝明月以催詩窖好花而賸爵猶憶薄游燕市  
小住餘杭備聆思舊之言遠致懷人之什琴尊兩地槃  
敦卅年午橋思致政之閑丙舍踐卜鄰之約誰是千秋  
作者林泉與鐘鼎不殊公爲一代傳人官職與詩名並  
重夢酒田之煙月歸來倘住羅浮據詩境於湖山位置  
原宜仙佛文集卽儲 四庫才人之福命誰如節旄兼

督八州闡宇之兵刑亦靖

順德金竹鄉黃姓聯壽序

代

維咸豐改元歲次辛亥月在孟春爲我鶴如年丈九旬  
晉二攬揆之辰壽將屆乎百齡冀預期乎八載英靈所  
萃壽考維祺簪紱門庭文章宿老蓋於道光二十有九  
年歲次己酉大府請於 朝詔許欽賜舉人一體會試  
越二年矣五老榜中夙推耆舊羣仙會裏尤擅才華兔  
月羊燈鸞簫鼉鼓圖宜成乎五嶽觴合進乎九霞乃丈  
方且憮慄而辭黎收而拜謂一家之樂何如合族之歡  
也 千叟之榮亦似同人之慶也况吾宗居同橘井地  
似菊泉代有眉梨門多耄艾狀元宰輔康彊叨一品之

榮武帳文絃矍鑠忝厯科之選種荔者獨傳軼事食苹  
者多屬遐齡學士門高秀才村古道南道北綠鬢朱顏  
解東解西緋衫牙笏重以

聖天子累洽重熙乾亨坤慶安居樂俗蹈德咏仁方以  
八千歲而爲春宜偕六百人而聯壽鄉名金竹醺合銀  
花而勝會舉焉僕久辭節鉞度庾嶺而能來遠辱音書  
決黃童之必貴統仙凡以媵爵介里黨以徵文烏可無  
言以誌美舉蓋七十者共若干人七十至八十者共若  
若干人八十至九十者共若干人也盛矣哉非惟宗族所  
罕聞殆亦昇平之僅事矣然使其生平多幸甲子懽然

國似渠搜族猶泰上如魏文侯之伎似范明友之奴性  
比龜龍生猶雀鵠歸爲丁令威之鶴馭拜似楊霞舉之  
雞窠縱蒲柳之未衰與草木而同壽惟丈生有至行益  
勵純修操冠秋雲心盟止水雷霆劈柱端居不聞塵埃  
滿牀坐處獨淨鄰家偶落桑葢仍遣拾還荒祠古有柏  
材未妨竟伐而諸君子者亦能鞠躬履方與物無間生  
平共諒通介兩忘各念馬少游之言車乘下澤宜效陳  
仲弓之訪社結德星其不可及一也惟丈少年作賦卽  
許凌雲中宵讀書卻喜隨月比粲花而共豔仍流麥而  
不知王氏青箱馬融絳幔琴雖焦灼蔡中郎業屢賞音

劍自光芒張壯武猶然勵志而諸君子者亦能文史足  
用琴書自娛册匪兔園薦誰狗監耄而好學衛武公有  
抑戒之詩偶與聯吟吳清翁有雜興之作其不可及又  
一也惟丈卹貧窶憫單寒魯肅指困邸成分宅通有無  
於族黨同豐儉於鄉家訪江革而割氈過子桑而裹飯  
糟糠未饜因仍述公緒之談似續更生稠疊荷參軍之  
惠而諸君子者亦能推食解衣捐贏斥羨第哀韓信原  
無望報之思待謝黔敖絕鮮嗟來之語助葬慨然而與  
麥拯饑何礙於發棠其不可及又一也惟丈石麟遞降  
麟虎爭推弟兄無腰鼓之嘲少小屏香囊之飾六龍誰



最五鳳齊飛訓迪綦嚴修治敢懈恪遵庭誥彌欽陳紀  
而訂交自有家風獨賞楊惓之恬裕而諸君子者亦能  
兼課十經各守一藝盤游相誠視履考祥塵尾蠅拂之  
必燒中翬廁牖其自滌翁名知稼兒詠采蘭其不可及  
又一也其他懿行皆罄竹所難書及此芳辰宜坐花而  
共醉山明海晏全家皆皇古之民雪刺霜毫六秩尙少  
年之輩會何拘乎同甲節適屆乎上元青鳥重來黃鸝  
三請集人瑞於榆枌之社叙天倫於桃李之園覩桂馥  
兮蘭芬知松茂兮柏悅覺商嶺四皓難擬其多淮南八  
公未符此數以至香山圖畫仍匪一家洛社衣冠本非

同姓方斯蔑矣耕推漁讓柳媚花明太和醞釀於一門  
至樂流聞於千古隱襲紗帽端畱著作之身散髻斜簪  
合主耆英之局內翰方當著詠投以新詩宜徽轉欲寓  
名惜非同譜爾

張母王太夫人六十壽序

代

維道光二十有五年歲次旃蒙大荒落爲

皇太后七袞大慶越明年柔兆敦牂爲張太師母王太夫人六袞壽辰曾寓澂懷園者數載矣特爲作殿比張文達之還朝親拜於庭匪孫仲謀而臨賀將吏俱迎於道側公卿同詣於府中馬防與百萬之俸錢薛濬餉四時之珍味孝先侍宴勅許將還謝朓寄居詔加優禮敬與忠藎卽聞中使迎回晉國遭逢屢荷太宗存問伏見臣惟法

主玉卮與西王母之筵仍勗國爾忘家錦衣倍南郡守

之祿榮矣哉蓋不特房敖之僮事而翕然揄狄之美談  
矣維太師母橫雲家世春月聰明園有賜金園名門多列  
戟昭君族姓原工樂府之篇道韞才華屢誦毛詩之句  
大母憐其夙慧雙親挾以遠行儒素藉乎女紅針神兼  
乎絲絕檢南州之行篋未擬楚騷讀東觀之藏書當成  
漢表其歸我太夫子也闕補鴛鴦之社中符孔雀之屏  
廣卻扇於湖湘笑鳴機於廨署比穆姜之義藥餌親嘗  
伫郭丹之來衣裝可鬻倚門無異憐小阮而與偕授室  
有期勗皇甫而就學太夫子解劍之官鳴絃作宰廿年  
兼吏琴鶴蕭然一樣寒閨弋鳬相警竇連波之婦待織

迴文王仲卿之妻何知封事恩隆琢斛智美椎環貧憤  
鬻釵寒先藝粥旣而竟賦遂初條然卻掃裙襦悉典備  
知宦况而敢言杖屨相依未妨子職之仍代卹孀幼拯  
孤羸族黨咸頌其太和寒單各分其餘濶石麟遞降玉  
燕紛投宜其嶽降嵩生孔抱釋送我小圃夫子蘇亮一  
歲三遷唐瑾十旬九職自嫌早達竟作侍中但有好官  
輒思元保旬月便昇端右王褒益自謙虛廿年當作司  
空崔光原無咎譴

帝者與同筆研竄中爭仵軒輶休徵早獲貂蟬大才遠  
軼麟鳳劉之亨行臺承制前舉秀才岑文本徒步布衣

業幾宰相仍夢絲以進秩早覆甌而貶名所以興慶首  
行譙國一例家人親款御者攜扶朝右迴班禁中通  
籍金章紫綬丹轂文軒以

覃恩誥封一品太夫人龜回顧而印同鳳齊飛而詔下  
蔡襄冠帔欽帳幃君羹遞嘗朝服恪侍嗜惟竹筍何  
假外求賜有葡萄亦非難致蕭俛幾爲元宰仍比褐衣  
伯始曾匪高年宜無拄杖甘泉畫在漢有日磾丞相親  
存唐惟元振汝南持節大常導輿蓋太師母至是而後  
喜可知已顧說者謂良玉珍奇端俟琢磨之力精金斷  
制原資辟灌之功當其綺年共慶吉夢維何謝密襲建

昌之封伏高縣光祿之嗣亦謂筍非生外依然豈本同  
根訓以義方貽之法矩誠其仁恕曷以修能弦急韋寬  
肉方葱寸原修小節投稱鍾而不煩倘易異書傾筍金  
而誰惜喜驚騰之轉速慮報稱之綦難謂宜遠徹乎幽  
微庶足稍償乎 高厚王叔玠才兼公輔早識元齡韓  
康伯掌到銓衡先舉吳隱已且也宗姻足府金倉粟而  
綢繆墜履遺簪門庭有連騎鳴鐘而料理筆牀茶竈素  
琴石研縞袂青裙善則歸親貴原以母所謂有是德宜  
有是福者直其然矣地屬三吳衡文職重時逢五日設  
悅辰良斟郢水之醪斫蓬池之膾村場簫鼓塔寺香花

檀橋生徒蓮府賓從僧孺清道貴越中丞虞潭養堂拜  
有王導石榴多子符吉慶以剛開慈竹生孫報平安而  
共醉某等忝居門下多在嶺南原慙杜補闕之綠衣未  
參末座會謁宣文君之絳幔仍愧專經酒特進以祝延  
文遍徵而寄遠隨處名題千佛怡然寸草春暉端陽會  
合羣仙直到荷花生日待師弟同聽老子重舉壽觴知  
兒孫並效齊賢永司台鼎



陳母高太宜人九十壽序

代

維咸豐改元重光大淵獻之歲日月會於壽星之次爲  
我 誥封太宜人陳母高太宜人九袞大慶之辰早兆  
麟振百年靡艾誰諸鳳卜五世其昌同修拜母之儀壽  
安坊佳殆合 旌閭之典通德門開適沛

覃恩渥膺 殊錫 特頒瑞錦仍資精鏐榮矣哉 國  
恩家慶緝福曼齡揚嫩導懿又烏能已夫裴潛之門有  
秀枚乘之後生皋王苻無外家業傳著論陶侃有賢母  
實使知名然或未徵同夢之蘭自詡創生之蔗微詞間  
涉懿行能完而乃小星一點永拱文昌寶月重輪並懸

忉利座環銀鹿會無並嫡之嫌杖碎金魚同勵紹先之  
志魏上庸之諸子同勗以義方劉泰瑛之四男動依於  
法矩猜嫌自泯德禮無愆同謂婦師夙稱女表人如錦  
繖有金篋以陳庭客匪黃裳許綠衣而入座已太宜人  
者乃璞山先生之側室而兩村守戎曉村廣文之生母  
也蕙問蘭儀松茂柏悅衾裯獨抱井臼親操誰矜賦茗  
之才自守織蒲之分游覽相伴知雅愛乎清娛操作而  
前久不煩於德曜時翟太宜人慰情有女占夢非男太  
宜人早降石麟仍投玉燕任昉則懸鈴所誕高琳是浮  
磬之精竊恐朱幘先歌金釵迭餉爲兒皆起諭聞宣氏

而依然見汝猶憐貴似南康其善遇乃以子貴者自銘  
夫壻之恩而與婦同者彌獲女君之眷承箕帚付米鹽  
婢織奴耕一錢尺帛桃開敢祈原推交讓之花筍密同  
裁豈有孤生之竹其自貫魚承寵以泊別鶴流哀取印  
投戈推梨讓棗白頭相對彌安實命之不同黃口何知  
幾忘所生之誰自迨至古稀之已屆同欽老福之幡然  
合宗姻里邨以徵詩率子婦孫會而媵爵金章少母先  
趨堂下而祝延王鬢小妻恪侍筵前而介壽蓋翟太宜  
人之喜可知已瓊蕊無徵蓼莪竟廢朱邪劉后偏憶太  
妃潁昌何俟無慙孝子莫問屬毛離裏匪母德而何依

自然竭力盡忠庶妾心之不愧由是獨承家業倍肅閨  
儀婦姑收膈膊之基賓友訝咄嗟之饌璇閨月黑相環  
而共勸停梭鏡檻花明偶看而誰聞著釧且也存拯親  
類散贍六姻或邂逅而脫巾或迴環而拯斛單丁下戶  
勞輸儉歲之租竈婢廚攘飽飫侵晨之粥亦可謂巾幗  
所難能而中外當共式者矣撫字誰別訓迪基嚴笥金  
惟使易書堂饌或供談義脩勤勿替箠仍加三千萬  
錢唯戴頌子之兒可敵十二幅被亦孟恭武之館曾裁  
宜其金友玉昆昂霄聳壑真將軍共推無卹好秀才端  
屬正元三虎齊稱八龍可抗對擁旄節足荷門基繞膝

孫多免懷兒壽箕裘業紹僅紀樗蒲 綸綽恩推早頒  
翟弗我曉村廣文材堪二府聲雋一黌誰甘苜蓿之盤  
合預櫻桃之醺程春海侍郎曠代逸材 熙朝碩望壬  
辰省試星輶遠涖冰鑑同懸驥足騰驤竟屈副車之首  
選龍頭位置定符鼎甲之深期已某職慙撫部采預輶  
軒願企躋堂侑先康爵喜鄉評之允協寶典社倉知田  
籍之鈎稽宜擢計相饌羅麟脯樂奏鸞笙人猶縞悅青  
帟地本瓊樓玉宇哲嗣則伯歌季舞迭資犀錢賢孫則  
武達交通並登虎榜酒田供養看到雲初詞苑才華足  
兼將相閒如騎省起居同八座莊嚴豪比元龍營造有

歲爲三秋護樹北堂而延慶導輿人老謝 闕廷而犀  
杖代攜捧檄孫賢課曾元而熊丸仍和七葉之承華預  
卜祇緣寸草留暉百花之豔福誰如齊頌牡丹生日

樂志堂文集卷九